

## 哭劉伊璜兄

朱 夏

一般狂態畏人知，執手天涯已恨遲；猶說少年輕小別，竟難短句尋哀思！川原淚盡花飛處，關塞魂歸月黑時；身世傷心誰索解；哭君強自托微辭！

× × × × × × ×

無雙羣兒譽聰明，我况尊前識至情，呼作狂生原不忤，甘爲情死豈無名；吞來心影針穿就，吐到哀詞血染成；地下此心難化石，秋虫休傍墓門鳴！

× × × × × × ×

一夕甘傾十萬杯，征哀拚爲換新醅，也知濁酒原狂藥，奈此身心是死灰！舊約忍撫魂已斷，殘香待浣首重回；劉郎自入天台夢，欲往人間意總摧！

× × × × × × ×

記辦輕裝事遠游，綺緣自分此生休；「懺除 融骨消魂恨，甘作求田問舍謀」，偏有靈心雲外寄，難禁餘怨夢中留；至今注海傾河淚，總向情天缺處流！

× × × × × × ×

人間早是怯無依，感舊傷離事事非；永夜秋江悲雨霧，崇朝春樹泣芳菲；千重劫已三生誤，七尺軀原一擲微！畢竟此情難解識；傷心身後問誰饑！

爲說清游祇可哀，江村此日怯春回；寄詩未解傳奇怨，酬酒知難及夜臺；天末寒雲關永憶，人間靈卉莫輕開！昆明池水曾無恙，魂魄休勞問劫灰！

卅三年二月二十八日，北碚